

**P**rije nekoliko dana prijatelj mi je prepričao mail koji je dobio od školskog druga iz Amerike, koji mu se požalio da nikako ne može prodati kuću sa šest spavaćih soba negdje na Floridi u kojoj živi sa suprugom i djetetom, a za koju otplaćuje kredit proteklih 10 i trebao bi još nekih 20 godina. Na moje pitanje šta tri osobe rade u kući sa šest spavaćih soba, ako zdrava logika kaže da jedna osoba u isto vrijeme može spavati samo u jednom krevetu, dakle, u jednoj spavaćoj sobi (čak i kad su supružnici posvađani), odgovor je bio slijeganje ramenima. Svakoga dana svjetski mediji izvještavaju o otpuštenim bankarima i brokerima od tridesetak godina koji svoje luksuzne ferrarije, mercedese i slične vozilice moraju zamijeniti podzemnom željeznicom ili gradskim prevozom. Paćenici, eto, nemaju ni za taksija...

Onda sam bila svjedokom kako se jedan ovdašnji tridesetogodišnjak žali na činjenicu da vozi službenu mazdu 3, treba mu nešto moćnije, jer mu kao, ne stoji mazda 3???

Nekako u isto vrijeme, ovdašnji, uspješan biznismen mi se žalio kako u njegovoj kompaniji mladi naraštaji čim nauče raditi (i to najčešće samo dio posla na svom radnom mjestu) odmah traže razgovor koji se tiče povećanja plaće, boljeg radnog mjesta, statusa i sl.

Nakon što sam čula i pročitala sve ove svjetske i domaće priče, meni je, barem, postalo kristalno jasno gdje je uzrok

krize kojom nas svaki dan bombarduju...

Namjerno sam potencirala koliko godina imaju ljudi, glavni "junaci" ovih priča... Svi imaju nešto više od trideset godina i realno, nisu imali šanse da se pošteno zagriju na poslu, a žele sve... I to ne za pet ili deset godina, nego sad i odmah?

A kako su oni ispod ili oko 30 milioneri, samo ako su ekstremno pametni i uspješni poput Marka Zuckerberga (poznatijeg kao Facebook) ili im je pradedo započeo, dedo razradio, otac doradio, a oni naslijedili porodični stoljetni biznis, ogromnom ostatku ljudske vrste za zadovoljenje "osnovnih" potreba tipa kuća sa šest spavaćih soba, bijesnog auta, egzotičnih putovanja, ostaje samo - zaduživanje (da ne spominjem onu goru varijantu, tipa pljačka - krenu od laptopa, pa dokle stignu)...

Sada je došla ona faza kada nezarađeno valja vraćati, a u međuvremenu se ispostavilo da kuća sa šest spavaćih soba ne vrijedi ni trećinu kredita koji se mora vratiti, bijesno auto se ne može prodati ni upola cijene, bolje radno mjesto i veća plaća sačekati nekoliko godina.

Ukratko, pad s konja na magarca... A takvima je i magarac upitan! **B**

**Aida Delić**

*Glavna i odgovorna urednica*